

121

128

I

DEO OPTIMO MAX:

UNI ET TRINO,

VIRGINI DEIPARÆ, ET S. LUÆ;
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS;
*manè discutienda, in Scholis Medicorum, die Jovis, decimo-septimo
mensis Januarii, Anno Domini M. DCC. XLIII.*

M. SYLVESTRO ANTONIO LE MOINE,
Equite, Doctore Medico, Præside.

An obliqui oculorum nesculi retinam à crystallino removeant?

I.

LUMINE nihil sensui clarius, nihil menti obscurius. Non paucae tamen ejus affectiones duce experientia detectae. Secundum lineam rectam diffunditur. Eandem semper insitit viam, nisi reflectatur corporum durae & opacae molis objectu, aut diversae raritatis media trajiciendo frangatur. Anguli incidentiae & reflectionis sunt aequales. Cum lumen è medio rariori in densius oblique transit, refringitur accedendo ad perpendicularem: ubi è medio densiori in rariori commeat, illius refractione fit per recessum à perpendiculari. Pro varia mediorum raritate aut densitate, juxtaque diversam radiorum luminis inclinationem plus minusve refringitur lumen. In iisdem mediis eadem est ratio sinuum angulorum inclinationis ad sinus angulorum refractorum. Quodcumque objecti aspectabilis punctum quoque versus innumeros luminis radios mittit, eosque divergentes. Qui ex eodem puncto emissi pupillam ingrediuntur, conum efformant. Dum oculum pervadunt, varios offendunt diversae densitatis humores. Soli perpendiculares radii irrefracti viam pergunt, ceteri in singulis humoribus franguntur, & sic fiunt convergentes, ut sese in puncto non ita remoto interfecerent. Post ultimam refractionem alium conum efformant, cujus vertex est punctum concursus. Ex his duobus conis, directo scilicet & refracto, componitur penicillus opticus. A diversis punctis diversi oriuntur penicilli, quibus objectum in retinam depingitur. Haec si penicillorum apici occurrat, distincta est imago? si verò ultra eorum apicem sistatur, vel si crystallino sit vicinior, quam radiorum coalitus, confusa est objecti delineatio; tum anim

A

radii, qui ad diversa objecti puncta pertinent, concurrunt in eâdem parte retinæ, & qui ex eodem puncto emanant, diversas retinæ partes afficiunt. Radii ex eodem rei vicinæ puncto emissi, magis divergentes sunt, quàm qui ab objecto remotiori proficiuntur: hi ergò propius crystallinum, quàm illi coalescunt; ideo si retina sit ad conspiciendas res distitas aptè collocata, ut proximæ videantur, eam à crystallino removeri necesse est.

II.

UT ratio evincit radios è loco remoto profectos, ad minorem distantiam, post refractionem uniri, quàm qui è vicino prodeunt; ita illud multiplex experientia demonstrat. Si vitro convexo chartam duplici foramine pertusam glutine affixeris, & ex unâ parte objeçis facem, ex alterâ verò radios per foramina trajectos exceperis chartâ albâ; patebit eos ad majorem, vel minorem à vitro distantiam coalescere, prout fax propior, vel remotior fuerit. Convertatur oculus artificialis ad objectum aliquod illustre proximum, & sic retina collocetur, ut ejus distinctam imaginem excipiat: si postea dirigatur iste oculus ad aliud objectum remotius, hujus imago confusè delineabitur in retinâ, nisi ipsa ad lenticulam vitream in oculo conclusam admoveatur. Idem in hominum oculis accidere probant malo suo fato Presbytae ac Myopes. Hires vicinas distinctè vident, remotiores confusè; id vitii pariunt comea, aut crystallinus convexior; tum enim radii nimium inflectuntur, propiusque crystallinum coeunt: unde cum objecta remotiora spectant Myopes, retina non potest usque ad radiorum coalitum accedere: specillis concavis uti solent, quorum ope radii disperguntur, & ita longè à crystallino concurrunt, ut si ab objecto vicino proficerentur. Contrarium est Presbyterum vitium; res eminè spectatas cernunt distinctè, propinquiores non item. In illis vel crystallinus humor non satis turget & majoris sphaeræ segmenta æmulatur, vel exsiccatis fibris trahuntur introrsum oculi. Hinc radii ab objecto vicino profecti longius à crystallino coeunt, quàm ut ad eorum concursum removeri possit retina ossibus cranii impedita. Magno sunt ipsis adjumento perspicillia convexa, quibus radii efficiuntur minùs divergentes, adeo ut tam propè crystallinum colligantur, quàm si ab objecto remoto prodirent. Eodem vitio laborarent cæteri homines, si immota sisteretur retina, ubi concurrunt radii ex objecto sex pedibus v. g. distante manantes; tum enim radii ab eo, quod distat tribus aut quatuor digitis, profecti, non nisi ultrâ illam concurrerent: (objectorum autem plus quam sex pedibus distitorum radii ad eandem ferè distantiam coalescunt.) Ut ergò res proximæ conspiciantur, retinam esse oportet remotiorem à crystallino, non quidem hujus accessione ad pupillam, cum ad eam quantum satis est accedere nequeat, sed retinæ à crystallino recessu.

I I I.

DIVERSARUM partium elegantissimâ compage contextitur oculus; omnes ad ejus functionem conspirant, sed non ex æquo; unde non eadem est illarum utilitas & dignitas. Primum locum sibi vindicat retina, quæ ex nervi optici interiore substantiâ quasi expansâ constat, & primum visionis instrumentum censeretur debet. Proximè sequuntur humores, aqueus scilicet, crystallinus, & vitreus: his radii luminis franguntur, ut in retinâ con-

currant, & objectum delineent. Membranis continentur humores ne diffuant. Præter retinam & tenues illas, quæ crystallinum & vitreum humorem involvunt, tres membranæ recensentur, adnata sive conjunctiva, sclerotica & choroides. Sclerotica à parte anteriore ob pelluciditatem corneæ nuncupatur. Choroides pars anterior, etiam mutato nomine, appellatur uvea: in hujus medio foramen est pupilla dictum. Suos habet musculos ad motum oculus; sex in humano numerantur, quatuor recti & duo obliqui. Fibris musculosis instructa est uvea, quæ pupillam modò contrahunt, modò dilatant. Ex oculi motibus quidam observantur, quidam ratione tantum deducuntur. Conspicua est axium opticorum versus diversa objecta directio, quæ efficitur, ut horum imago sit magis distincta. Patet etiam pupillæ dilatio, ejusque contractio ad plures, vel pauciores radios, pro vario objecti fulgore admittendos. Quicumque alii motus oculo, vel ejus partibus tribuuntur sub aspectum non cadunt; talis est assertus retinæ à crystallino recessus. Hujus causam si requiras, partes oculi recensitas expende: nulla præter obliquos musculos ita comparata est, ut hunc motum possit edere; ipsi verò structuram habent ad illum efficiendum maximè accommodatam; neque aliud quidquam eos præstare existimaveris.

IV.

OBLIQUORUM musculorum alter, minor vocatus, circa majorem oculi angulum exoritur; per infimam partem delatus ad angulum externum tendit: alter major vel trochlearis dictus prioris est antagonista; originem ducit ab oculi fundo, dein rectà fertur versus majorem canthum, & per trochleam trajectus, ad partem supremam oculi reflectitur, definitque ultra musculi recti attollentis tendinem. Contrahuntur simul hi duo muscoli, & oculus, quem constringunt, in longum producitur, imminutà latitudine, atque adeo retina à crystallino remouetur. Non in alium usum facti videntur isti muscoli: nam quod aiunt, eos seorsim agere, ita ut alter ad angulum internum, alter ad externum oculos in gyrum circumagant, commentum est: si enim per hunc motum intelligant oculi agitationem circa axem opticum, fictitius est hic motus, oculorum functioni omnino inutilis, nec ullà unquam attentione observandus: nunquam enim ad latera deducuntur supremæ & infimæ oculorum partes; si per hunc motum designetur axium opticorum directio in gyrum, vera hæc est & conspicua; neque enim integrum modò gyrum, sed plurimos quoque secundum eandem determinationem perficere oculus animadvertitur; sed manifestum est hunc motum à musculis obliquis non produci; neuter eorum, etiamsi solus ageret, per circuitus mediam partem oculum posset convertere; à quatuor musculis rectis dependet iste motus: hi ducunt originem à margine foraminis, per quod orbitam ingreditur nervus opticus: eorum tendines lati & tenues in corneam inferuntur; si seorsim agant, axem opticum oculi fursum, deorsum; ad dextram vel sinistram ducunt; cum duo vicini simul æquas vires exercent, axem movent ad æqualem ab utroque distantiam; ubi alteruter fortius trahit, ad eum axis accedit magis, cujus actio est potentior; omnium successiva contractio axem opticum in gyrum, seu circulum dirigit.

CRYSTALLINI humoris figuram mutari censet Cartesius, eumque magis, aut minus convexum evadere pro variâ objectorum distantia: sic quidem rerum tam vicinarum quam remotarum imagines in retinâ immotâ distinctè exararentur. Verùm hæc crystallini mutatio fieri nequit nisi per ciliares processus, qui tenuiores sunt, quam ut comprimant humorem hunc spissum, & arctè vitreo coherentem; ad pupillam potius traherent crystallinum, quam ejus figuram immutarent; hæc enim ligamenta ad uveam sunt inclinata, cùm ex totâ crystallini circumferentiâ desinant in choroeidem ad uveæ ambitum. Insuper crystallini figuram exquisitè sphericam esse oportet, ut radii colligantur; per tales autem mutationes humor iste pluribus stratis invicem superpositis constans exasperaretur rugis, vitiatâque ejus figurâ nihil nisi confusè videretur. Stat ergò inconcussum retinam à crystallino removendam esse, cùm oculus ad dissitas res videndas compositus convertitur ad objecta proxima; quod soli præstare possunt muscoli obliqui; hicque proprius est ipsorum usus. Cùm enim oculi præcipua pars sit retina, cæterarum oculi partium usus non modò ex earum structurâ desumendus; sed etiam ex auxilio, quod conferunt, ut retina debito modo afficiatur. Si confertis viribus agent, & oculum constringant obliqui musculi, retina à crystallino ita recedet, ut in concursu radiorum ab objecto vicino proficicentium existat, idèdque illam non mediocriter juvabunt ad munus obeundum; si alteruter solus ageret, oculum quidè converteret circa axem opticum, sed per hunc motum nullam opem retinæ adferret; idcirco musculorum obliquorum usus est oculum constringere, & in longum producere, non verò circa axem opticum movere.

Ergo obliqui oculorum musculi retinam à crystallino movent.

DOMINI DOCTORES DISPUTATURI.

<i>M. Ludovicus Renatus des Bois.</i>	<i>M. Natalis - Maria de Gevignand.</i>	<i>M. Antonius Casamajor, Censor Regius.</i>
<i>M. Carolus-Ludovicus Liger.</i>	<i>M. Franciscus-David Herissant.</i>	<i>M. Raymundus de la Riviere.</i>
<i>M. Joannes-Stephanus Guettard.</i>	<i>M. Ludovicus-Maria Poussé.</i>	<i>M. Urbanus Leaulié, Antiquior Scholæ Magister, Ex-Declarus & Academiae Censor.</i>

Proponebat Parisiis ANTONIUS LE CAMUS, Parisinus, Saluberrimæ Facultatis Medicinæ Parisienfis Baccalaureus, A. R. S. H. 1743. a sextâ ad medicinam.